

اللجنة الوطنية لحقوق الإنسان

مسرحية

الأحاديث
جزيرة الاختلاج

تأليف وإخراج

طالب الدوس

تم عرض هذه المسرحية على ضفة صرح قطر الوطني
بداً من اول ايام عيد الاضحى المبارك ١٤٢٧ هـ
الموافق السبت ٢٠٠٦/١٢/٣

عباره عن ائنه
دانه / منصور
عم / اللوحه

الفصل الأول

اللوحة الأولى

المنظر : في مقدمة المسرح توجد ساحة جميله محاطة بالأشجار في الخلفية توجد مجموعة من البيوت المحيطة بهذه الساحة . . هناك بيتان واضحان حيث نرى جزء مقطعي منهما حيث ستدور بها بعض الأحداث .

(تفتح الستار على استعراض غنائي يقوم به أطفال الحي وبينهم دانه حيث يتغنون عن فرحتهم وحريتهم وحقوقهم كأطفال بأن يعيشوا بأمان وسلام ، بينما تحاول دانه أن تحكي لهم حلمها للسفر في البحال الى جزيرة الأحلام)

يظهر منصور في شرفة بيته المظله على الساحة فيناديه الأطفال لكي يمرح ويلعب معهم .. يرفض ويظهر حزنه فتحاول دانه ومن معها معرفة سبب الحزن حيث نرى في شاشة الخيال الموجوده في خلفية منصور مشاجره ومناوشة بين ابيه وامه فنعرف انه يعاني من المشاكل الأسريه فيحثونه الأطفال ليشاركهم فيوافق (يدخل العم سلامه وهو بملابس العمل حيث يعمل ربان سفينه وهو يحمل هداياه لأطفال الحي ويوزع عليهم الهدايا حيث يخبرهم عن البحر وحياة البحر فتسأله عن جزيرة الأحلام فيخبرها بأنها جزيرة ساحره تعيش بحب وسلام وامان وحرية وأن رحلته القادمه ستكون لهذه الجزيرة .)

(تخرج من منزل دانه إمرأه وتوبخ دانه لخروجها ولهوها وتطلب منها القيام بأعمال المنزل حيث نعرف أن هذه المرأه زوجة ابيها فتسحب المرأه دانه للمنزل حيث نرى دانه وهي تقوم بالأعمال المنزليه تحت سلطة وتهديد زوجة ابيه)

(بعد نهاية الإستعراض ينتشر الأطفال في الساحة يلعبون بينما يقترب منصور من العم سلامه)

- منصور : عم سلامه
- عم سلامه : خير يا منصور .. اكيد الهدية اللي جبتها لك ما اعجبتك
- منصور : لا يا عم سلامه .. مشكور .. اعجبتني بس انا يا عم سلامه ابي منك شي
- عم سلامه : انت مب رحلتك الجاية على جزيرة الأحلام
- عم سلامه : اينعم تبي شي من هناك
- منصور : انا ابيك تاخذني معاك ..
- عم سلامه : اخذك معاي؟؟
- منصور : ايه يا عم سلامه ابي اسافر معاك على جزيرة الأحلام ..
- العم سلامه : (ضاحكاً) ولا يهملك يا منصور في الإجازة العوده اخذك معاي بس عاد امك وابوك يوافقون
- منصور : امي وابوي ما راح يوافقون
- العم سلامه : واشلون تبيني اخذك وهم مب موافقين
- منصور : هه .. يا عم سلامه انا امي وابوي ما يحبوني
- العم سلامه : لا يا منصور ايش هالكلام .. انت عاقل فيه حد امه وابوه ما يحبونه
- منصور : عيل ليش كله يتهاوشون
- عم سلامه : ايه بس هذا مب معناته انه ما يحبونك ويخافون عليك
- منصور : يعني انت ما بتاخذني معاك جزيرة الأحلام
- عم سلامه : ان شاء الله باخذك معاي بالإجازة
- منصور : حتى لو ابوي وامي ما وافقوا
- عم سلامه : لازم يوافقون انت ما عليك انا بخليهم يوافقون بس انت انتبه لدراسك وما عليك من هالمشاكل اللي بين ابوك وامك
- منصور : ان شاء الله يا عم سلامه
- عم سلامه : انا بورح ارتاح بالبيت تبي شي يا منصور

- منصور : مشكور يا عم سلامه .. بس لا تنسى وعدك لي
- عم سلامه : العم سلامه اذا وعد ينفذ (يحمل عم سلامه اغراضه) يا الله يا اطفال مع السلامه
- (يودعونه الأطفال .. ويخرج)
- (حسون يقترب من منصور ويناديه ليشاركهما اللعب)
- حسون : منصور .. منصور .. ليش ما تجي تلعب معنا
- منصور : ما ابي اللعب يا حسون
- حسون : اشفيك يا منصور .. مريض
- منصور : لا لا
- حسون : تعبان
- منصور : (بضيق) لا
- حسون : متضايق
- منصور : لا لا
- حسون : عيل ليش ما تبني تلعب معنا
- منصور : انت ايش تبني مني .. يا اخي قلت لك ما ابي اللعب معاكم
- حسون : منصور انا صديقك قولي اشفيك
- منصور : (بغيط) حسون ابعد عني وخلي بروحي
- حسون : اشلون اخليك انا صديقك ولازم اعرف ليش انت زعلان
- منصور : ومن قالك اني زعلان
- حسون : لا انت زعلان
- منصور : لا مب زعلان
- حسون : لا زعلان
- (منصور يدفع حسون بقوة وتحدث بينهما مشاجره والأطفال يشجعون .. ولا تنفك المشاجره الا عندما نسمع صراخ يصدر من منزل دانه التي نراها بداخل البيت تنصدي لضرب زوجة ابيها .. يلتفت الطفل صوب بيت دانه في ترقب حيث تخرج دانه هاربة يساعدها الأطفال ويخفونها عن زوجة ابيها بسرعة التي تخرج لتبحث عن دانه)

زوجة الأب : وين دانه

طفل ١ : هناك (زوجة الأب تتجه نحو ما اشار الطفل)

طفل ٢ : اهنية ... (زوجة الأب تتجه نحو ما يشير الأطفال لها حتى تغضب منهم)

زوجة الأب : تقصون علي انا ارويكم

(تتهجم على الأطفال الذي يفرون من امامها بينما منصور يخفي دانه ولا يهرب معهم

تنظر زوجة الأب نحو منصور بغضب الذي يخاف من نظراتها فتقترب منه)

زوجة الأب : منصور

منصور : (يشعر بالخوف ولا يرد)

زوجة الأب : (تتأديه) منصور .. منصور .. منصور وصمخ

منصور : لو سمحتي خالتي انا ما اسمح لج تغلطين علي

زوجة الأب : انت ليش ما ترد علي

منصور : انا .. انا مشغول

زوجة الأب : ما شفت وين رحت دانه

منصور : (يبدو متردد ثم يستجمع قواه) خالتي انتي ليش تسوين في دانه جذيه

زوجة الأب : مب شغلك انا زوجة ابوها مثل امها وانا اعرف مصلحتها

منصور : نفس كلام ابوي وامي تعرفون مصلحتنا احنا صج اطفال بس نحس ونفهم اللي

يصير حوالينا

زوجة الأب : صج انكم عيال اخر زمن كل شي تبونه على كيفكم

منصور : احنا نبي حقنا بس حقوقنا عندكم

زوجة الأب : انت يا النتنه ايش عرفك بهالكلام هذا كلام كبار

منصور : وانتوا كله على بالكم ما نفهم شي

زوجة الأب : انا صج خبله اللي اتكلم مع ياهل مثلك (تهم بالذهاب .. يلحق بها منصور)

منصور : خالتي اترجاج لا تضربين دانه هذي انسانه لازم يكون لها شخصيتها وكرامتها

زوجة الأب : انا اضربها علشان تنربى وتتعلم

منصور : يعني ما تربونا الا اذا ضربيتونا .. صج احنا اطفال نغلط ونعاند واحياناً ما نسمع

الكلام .. لكن ..

- زوجة الأب : (مقاطعه) منصور .. اذلف عني احسن لك (تتركه وتتدخل بيته)
(يذهب منصور نحو مخبأ دانه ويناديها)
- منصور : دانه .. دانه .. اطلعي .. اطلعي يا دانه راحت (تخرج دانه خائفه)
دانه : خافه يا منصور
- منصور : اقولج خلاص راحت
دانه : يمكن تطلع مره ثانيه
منصور : اذا طلعت اشردني
دانه : وين اشرد يا منصور اكيد بعدين يرجع البيت ويتطقني
- منصور : مسكينه يا دانه
دانه : قولي يا منصور ايش اسوي
منصور : ما ادري يا دانه حتى انا مب عارف ايش اسوي ابوي وامي دايماً يتهاوشون
(يدخل حسون) (يرى حسون منصور فيصد عنه وهو زعلان)
- منصور : حسون .. حسون .. أنا اسف
حسون : (لا يرد)
- منصور : عاد خلاص حسون سامحني انا قلت لك اسف خلاص
دانه : اشفيكم ايش صاير امبينكم
حسون : اسأليه يا دانه اسألي منصور
- منصور : انا كنت متضايق وتهاوشت معاه وجدامج اعتذر له ومب راضي يسامحني
دانه : خلاص يا حسون المسامح كريم سامحه .. انتم اصدقاء ولازم تحبون بعض
حسون : انا احبه بس هو ما يحبني
- منصور : لا يا حسون انا احبك انت صديقي
حسون : عيل ضربتني
- دانه : لو كنتوا بجزيرة الأحلام جان ما تهاوشت لأن اللي يعيشون بجزيرة الأحلام ما يتهاوشون ويحبون بعض
- منصور : خاطري اروح جزيرة الأحلام .. هناك ما بشوف امي وابوي يتهاوشون
دانه : وانا بعد خاطري اروح جزيرة الأحلام هناك ما في زوجة اب تضربني كل يوم

- حسون : يعني بترحون وتخلوني بروحي
- دانه : انت شايقنا رحنا .. احنا نعلم .. نتخيل
- منصور : لا يا دانه .. هذا مب حلم احنا ممكن نروح العم سلامه وعدني يوديني معاه جزيرة الأحلام
- دانه : يعني بتروح مع العم سلامه جزيرة الحلام
- منصور : ايه .. بس العم سلامه شرطه ان ابوي وامي يوافقون وانا متأكد انهم ما يوافقون
- دانه : وانا بعد ابي اروح
- حسون : زوجة ابوج بتخليج تروحين
- دانه : لا ..
- حسون : عيل خلاص محد بيروح
- منصور : واحنا ليش نخليهم هم اللي يتحكمون فينا
- حسون : هذول اهلنا
- منصور : صح اهلنا بس احنا مب مرتاحين معاهم
- حسون : منصور هذول اهلنا ويحبونا
- منصور : انت اهلك يحبونك بس انا وامي وابوي كله اهواش مع بعض وما يحبوني
- دانه : وانا زوجة ابوي ما تحبني كله تضربني
- حسون : انتوا من صجكم بترحون جزيرة الأحلام
- منصور : ايه يا حسون
- حسون : واشلون بترحون
- دانه : مع العم سلامه
- حسون : بس منصور يقول ان العم سلامه قاه لازم اهلك يوافقون
- منصور : وقال ان بيودينا بالإجازة
- حسون : خلاص ننظر الإجازة علشن اروح معاكم
- منصور : انا ما راح انظر الإجازة
- دانه : اشلون يا منصور
- منصور : العم سلامه بيسافر باجر على جزيرة الأحلام وهذي فرصه

- حسون : وابوك وامك بيوافقون
- منصور : انا ما راح اقولهم
- دانه : بس العم سلامه ما بيوافق يوديك معاه
- منصور : انا باروح معاه
- حسون : اشلون بتروح معاه وهو قالكانه بالإجازة بيوديك وبعد موافقة ابوك وامك
- منصور : انا بروح معاه من غير ما يعرف (استغراب على وجه دانه وحسون)
- دانه : اشلون يا منصور
- منصور : بعدين اقولج يا دانه هه انتي بتروحين معاي
- دانه : (تفكر وبتدو متردده) بس .. بس
- منصور : خلاص يا دانه خليج علشان زوجة ابوج اتم تضربج
- دانه : لا يا منصور انا رايحه معاك
- منصور : حسون
- حسون : لا لا انا ماب رايح معاكم
- منصور : ومن قالك تعال معانا انا ما ابي حد يعرف فاهم
- حسون : بس ما قلت لي اشلون بتروح من غير محد يدري
- منصور : بتعرف بعدين يا الله يا دانه خلينا نروح
- حسون : من اللحين بتروحون
- منصور : ايه من اللحين يا الله مع السلامة يا حسون (يخرج منصور ودانه .. حسون ييبدو عليه القلق)
- حسون : منصور منصور انا لازم امنعه انا صديقه ولازم انصحها منصور دانه (يلحق بهما)

افلام - موسيقى

(تفتح الإضاءة على نفس المنظر ، المسرح معتم نسبياً مما يعطي انطباع بأن الوقت ليلاً يخرج منصور من منزله خلسة وهو يحمل بعض حاجياته ثم يخرج حسون ويبدو عليه الخوف حيث الوقت ليلاً وهو يحمل بعض الأغراض يزداد خوف حسون عندما يتفاجئ او يصطدم بمنصور)

- | | |
|---------|--|
| حسون : | من انت |
| منصور : | (يداعبه) انا الحرامي |
| حسون : | (بخوف) حرامي .. ارجوك خلني ارجع البيت |
| منصور : | (بصوت غليظ) وين ترجع البيت انا لازم اخذك معاي |
| حسون : | استاذ حرامي اخر مره اطلع من البيت |
| منصور : | ياالله تعال معاي (يسحبه) |
| حسون : | انزين خلني اروح اقول حق ابوي وامي وارجع لك |
| منصور : | ايش تقولهم |
| حسون : | اقولهم اني بروح مع الحرامي |
| منصور : | تبي تقص علي وتشرد |
| حسون : | ارجوك يا حرامي خليني ارجع بيتنا |
| منصور : | اقولك تعال (حسون يصرخ .. منصور يرتبك فيسد فمه) |
| | حسون .. حسون ،، انا رفيجك منصور |
| حسون : | يعني انت مب الحرامي |
| منصور : | لا يا حسون .. انا منصور .. بس كنت اخوفاك |
| حسون : | خرعتني يا منصور |
| منصور : | كنت لعب معاك |
| حسون : | عيل وين دانه |
| منصور : | للحين ما اطلعت من البيت |
| حسون : | يمكن زوجة ابوها ما نامت او يمكن صاداتها |
| منصور : | اسمع انت انطرنى اهنيه وانا بروح |
| حسون : | (بخوف) وين بتروح وتخليني |

- منصور : لا تخاف يا حسون انا بروح اشوف دانه ليش تأخرت
- حسون : خذني معاك
- منصور : خلك اهنيه علشان زوجة ابوها ما تحس فينا
- حسون : انزين بس لا تتاخر
- منصور : ما راح اتاخر (يذهب منصور مسرعاً نحو بيت دانه)
- (يطرق منصور على النافذه فتفتح دانه النافذه وتطل)
- منصور : ليش تأخرتي يا دانه
- دانه : زوجة ابوي قافله الباب
- منصور : انتي قلتي لها انج بتروحين جزيرة الأحلام
- دانه : لا .. هي دائماً تحبسني بالغرفة
- (يفكر منصور ثم تخطر على باله فكره)
- منصور : انزين يا دانه انطريني وانا برجع علشان اطلعج
- (يخرج منصور من المسرح وتدخل دانه وتغلق النافذه)
- (يدخل رندوش وهو ملثم ويتلفت يمينا ويساراً ويبدو كاللصوص)
- رندوش : (يقترب من حسون) يا سلام .. حظي وايد حلو لقيتك بدون تعب
- حسون : (ينظر له باستخفاف) وين رحت انا .. أنا انطرك
- رندوش : (باستغراب) تنطرنى يعني انت عاف انى جاي ابوقك
- حسون : تبوقني
- رندوش : عيل جاي لعب معاك ايه جاي ابوقك
- حسون : منصور مب وقت لعب اللحين
- رندوش : من منصور هذا
- حسون : (ضاحكاً) انت منصور
- رندوش : انا مب منصور .. انا رندوش الحرامي .. حرامي الأطفال
- حسون : (ضاحكاً) يمه .. خوفتني
- رندوش : يعني انت مب خايف منى
- حسون : لا مب خايف منك

- رندوش : (يخرج سلاحاً وحبل) معقوله ما في حد يخاف من رندوش
- حسون : وبعدين معاك يا منصور
- رندوش : (بغيط) انا مب منصور .. أنا رندوش
- حسون : انت منصور .. وما بتخوفني .. ما بخاف منك
- رندوش : ما تخاف من رندوش حرامي الأطفال انا ارويك
(يهجم عليه ويحاول ربطه)
- حسون : (يلطم رندوش) منصور وبعدين معاك
- رندوش : (يهاود الهجوم عليه)
- حسون : (يلطمه) منصور لا تصير سخي
- رندوش : انا مب منصور .. انا رندوش
- حسون : ليكون نايم وتحلم يا منصور (يرش عليه ماء)
- (رندوش يشعر بالغضب فيهجم على حسون الذي يرى وجه رندوش جيداً)
- حسون : (بخوف) انت مب منصور .. انت من .
- رندوش : انا رندوش حرامي الأطفال
- (يهرب منه حسون .. فيلحق به رندوش ويمسكه ويخرج به الى خارج المسرح
بسرعه تفتح دانه النافذه وتطل)
- دانه : كأي سمعت صوت حسون (يدخل منصور وهو يحمل سلم)
- منصور : يا لله يا دانه .. انزلي بسرعه
- دانه : منصور أنا كأي سمعت صوت حسون يصرخ
- منصور : وأنا سمعته .. انتي ما تعرفين حسون اشقد يخاف اكيد خايف علشان تأخرت عليه
.. يا لله يا دانه انزلي (تنزل دانه على السلم ومعها بعض الحاجيات) :
- دانه : وين حسون
- منصور : واقف عند بيتنا (يتجهان نحو بيت منصور ويتفاجئان بوجود حاجياته وغيابه)
وين راح هذا
- دانه : اغراضه موجوده
- منصور : اكيد خاف ورجع البيت

- دانه : اشلون يرجع البيت هو ما قال انه يبي يروح معانا
- منصور : دانه .. حسون بيلعوزنا خلينا نروح عنه
- دانه : لا .. حرام يا منصور هو يبي يروح معانا جزيرة الأحلام
- منصور : دانه جذيه بنتأخر اكيد حسون غير رايه ورجع البيت يا الله يا دانه
- دانه : خلنا ننظره اشوي يمكن يرجع
- (تخرج زوجة الأب)
- زوجة الأب : دانه .. دانه ..
- منصور : يا الله يا دانه خلينا نشرد
- (يهربان)
- زوجة الأب : (ترى السلم) وين راحت .. معليه يا دانه ارويح (تبحث عنها)
- (يدخل حسون هارباً وخلفه يجري رندوش تخاف زوجة الأب وتهرب الى داخل المنزل)

- اظلام -

الفصل الأول

اللوحة الثانية

المنظر : ميناء بحري حيث ترى سفينه واقفه بالبحر والبحاره يحملون اغراضهم على السفينه في نشاط وجد بينما منصور ودانه يختفيان خلف الصناديق .. مجموعة اخرى تتظف الشاطئ (2)

استعراض غنائي عن العمل و النشاط ويتضمن كذلك الإهتمام بنظافة الشاطئ والإهتمام البيئي وكذلك فرحة منصور ودانه برحلتها الى جزيرة الأحلام)

- | | | |
|-------|---|--|
| منصور | : | يا الله يا دانه ننخش بالسفينه قبل لا يشوفنا احد |
| دانه | : | (متردده) منصور أنا خايفه |
| منصور | : | ايش منه خايفه يا دانه .. انتي ما تبين تروحين جزيرة الأحلام |
| دانه | : | ابي اروح .. بس اللي سويناه غلط |
| منصور | : | غلط اشلون غلط |
| دانه | : | اكيد اهلنا بيدورون علينا |
| منصور | : | دانه .. احنا بنروح للحريه |
| دانه | : | مب جديه الحريه يا منصور |
| منصور | : | واشلون الحريه يا دانه |
| دانه | : | الحريه ان احنا نستمتع بحياتنا |
| منصور | : | واحنا بنروح نستمتع بحياتنا ونعيش بجزيرة الأحلام |
| دانه | : | بس الحريه اللي اخترناها بتأذي غيرنا |
| منصور | : | اشلون .. |
| دانه | : | المفروض ان الحريه اللي نعيشها ما تأذي غيرنا اللحين اهلنا بيدورون علينا |
| | : | وبيزعلون وجديه احنا اذيناها |

منصور : صدقيني يا دانه ... محد يفكر فينا هم لو يفكرون فينا ما يسوون اللي يسوونه

دانه : اسمع مني يا منصور وخلصنا نرجع

منصور : ما في وقت يا دانه (دانه تبدو متردده ومحتاره)

دانه .. انتي بتروحين معاي والا لاء

(نسمع صوت العم سلامه من الخارج)

العم سلامه : قبل لا نسافر الى جزيرة الاحلام لازم انظف الشاطئ

منصور : دانه هذا صوت العم سلامه بسرعه خلينا ندش السفينه قبل لا يشوفنا

دانه : منصور .. انا خلاص ما ابي اروح

منصور : (بغيط) اللحين تقولين ما تبين تروحين بعد كل هالتعب يا الله يا دانه قبل لا

يشوفنا العم سلامه

العم سلامه : (صوته قادم من الخارج) جهزتوا السفينه عدل

منصور : يا الله يا دانه .. تحركي .. (يسحبها وبسرعه يختفي معها بأحد الصناديق

القريبه منهما يدخل العم سلامه ومعه مجموعة من البحاره)

العم سلامه : (للبحاره) الله يعطيكم العافيه .. ما شاء الله منظفين المكان عدل ايه احنا

لازم انظف الشاطئ من ورانا هذي شواطئ بلادنا ولازم نحافظ على

نظافتها .. (للبحاره) هه .. جاهزين للرحله

بحار : باقي صندوقين واشوية اغراض

العم سلامه : يا الله ايش تنطرون شيلوهم علشان نروح

(البحاره يرفعوا الصناديق وكذلك الصندوق الذي اختفى به منصور ودانه

.. العم سلامه يصعد الى السفينه بعد أن ينتهي البحاره من حمل الصناديق

وحاجياتهم يصعدون الى السفينه ويصبح الشاطئ خالياً)

(يدخل رندوش بحذر ومعه حسون الذي يكون مقيداً)

- رندوش : ما ابي اسمع صوتك .. فاهم
- حسون : ايه فاهم
- رندوش : ياالله بسرعه اركب هذا المركب قبل لا يشوفنا احد
- حسون : وين بتوديني
- رندوش : بوديك عند العم غضبان ..
- حسون : العم غضبان منهو العم غضبان هذا
- رندوش : في حد ما يعرف العم غضبان
- حسون : أنا ما أعرفه ..
- رندوش : اللحين لين اوديك عنده بتعرفه عدل
- حسون : انا ما ابي اعرفه .. الله يخليك خلني ارجع بيتنا
- رندوش : ترجع وين .. بيتكم على كيفك انت ياالله اركب المركب وخلينا نروح
- حسون : وين بنروح
- رندوش : جزيرة الأشباح
- حسون : (بخوف) وين
- رندوش : انت ما تسمع .. جزيرة الإشباح ما عمرك سمعت عن جزيرة الأشباح
- حسون : لا ما سمعت عنها وما ابي اسمع عنها
- رندوش : اوه انت الظاهر بتعبني وايد ياالله تعال
- حسون : (يصرخ) الحقوني .. الحقوني يا ناس (رندوش يغلق فمه ويسحبه بسرعه نحو المركب)
- رندوش : اسكت .. اسكت ولا كلمه .. اركب المركب
- حسون : الحقوني .. الحقوني (رندوش يحمل حسون ويضعه بالمركب وبسرعه يتحرك)
- (ينزل مجموعة من البحاره ثم خلفهم العم سلامه)

العم سلامه : منهو هذا اللي يصارخ

بحار : ما ندري

العم سلامه : كأن الصوت جاي من صوب هالمركب

(يذهب احد البحار وينظر نحو المركب حيث يختفي رندوش مع حسون
في قاع المركب)

بحار : ما في حد بالمركب

العم سلامه : انزين يا الله خلونا نمشي

(يعود الرجال الى السفينه التي تبدأ بالإبحار بينما يخرج حسون ويحاول
الإستتجاد بالسفينه ولا احد يسمعه ثم يقفز الى البحر هرباً من رندوش)

رندوش : وقف .. تعال وين بتروح .. وقف (يقفز خلفه)

(نرى السفينه تبحر ثم يخرج منصور ودانه من الصندوق منصور يشعر
بالفرحه بينما دانه تبدو قلق ثم تهجم عصابة من القراصنه على السفينه
وتستولي عليها وتقبض على من فيها)

- إظلام -

نهاية الفصل الأول

الفصل الثاني

اللوحة الأولى

المنظر : جزيرة الأشباح والتي تبدو تضاريسها مخيفه حيث تنتشر الجماجم على أشجارها وتدور في سمائها الطيور الجارحه وهناك في الخلف توجد الجبال الشاهقة والتي يوجد عليها خيالات الأشباح .. الجزيرة بشكل عام تبدو غير نظيفه

(تفتح الإضاءة على إستعراض غنائي حيث نرى مجموعة من الأطفال يقومون بالعمل مجموعة تقوم بتقطيع الأشجار ومجموعة تصيد السمك ومجموعة تطهو الطعام من خلال الإستعراض يظهر غضبان وهو يحثهم على العمل وأنهم عندما يكبرون سيغزون البحر وسفنه كقراصنة اقوياء ويسرقون السفن ويهدد من لا يسمع كلامه بالطيور الجارحه والأشباح وخلال هذا الإستعراض يدخل القراصنه وهم يحملون الغنائم التي استولوا عليها من السفينه وهم يقيدون العم سلامه ومنصور ودانه)
(في نهاية الإستعراض يقف غضبان امام القراصنه)

غضبان ✓	:	انا ما قلت لكم تبوقون السفينه وبس
قرصان	:	هذا احنا بقنا السفينه يا عم غضبان
غضبان	:	وهذول ليش جاييينهم
قرصان	:	انت ما قلت لنا نبوق الأطفال بعد
غضبان:	:	اينعم .. الأطفال مب الكبار (يشير للعم سلامه) هذا ليش جبتوه معاهم
قرصان	:	ما رضى يخليهم لحقنا لين الجزيرة ومسكناه وجبناه
غضبان	:	(يقترب من العم سلامه) انت منهو
العم سلامه	:	انا سلامه .. ريان السفينه اللي بقتوها
غضبان	:	انت ريان السفينه .. ايه .. وهذول عيالك
العم سلامه	:	لا .. هذول من مدينتي
غضبان	:	(لمنصور ودانه) انتوا ايش اسمكم يا حلوين

منصور	:	انا اسمي منصور
دانه	:	(بخوف) وأنا دانه
العم سلامه	:	انت منهو وايش تبي منا
غضبان	:	انت ما تعرفني
العم سلامه	:	لا ما اعرفك ..
غضبان	:	انا غضبان .. زعيم القراصنه وزعيم جزيرة الأشباح
دانه	:	(بخوف) جزيرة الأشباح
غضبان	:	ايه .. هذي هي جزيرة الأشباح شايفه ذيج الجبال هناك تسكن الأشباح
دانه	:	منصور .. منصور .. احنا بدال لا تروح جزيرة الأحلام صرنا بجزيرة الأشباح
العم سلامه	:	لا تخافين يا دانه
منصور	:	انا بعد يا عم سلامه خايف
العم سلامه	:	منصور اعرفك قوي وما تخاف
منصور	:	هذي جزيرة الأشباح يا عم سلامه
غضبان	:	شوفوا انا احذركم لا احد يفكر انه يشرد الجزيرة مسكونه بالأشباح والطيور
		المفترسه تطير فوق الجزيرة تحملوا تشردون
دانه	:	انت ما سرقت السفينه وخذت اللي تبيه ايش تبي فينا
		خلينا نرجع لأهلنا
غضبان	:	لا يا دانه انا ابيج انتي ومنصور لكن العم سلامه ما ابيه
منصور	:	وايش تبي فينا يا غضبان
غضبان	:	بعدين تعرفون .. بعدين اقولكم ايش ابي فيكم ..
		(يدخل رندوش وهو منهمك القوى)
غضبان	:	رندوش .. انت وين كنت وينك مختفي
رندوش	:	انا رحى ادور اطفال علشان اخطفهم ..
غضبان	:	بس انا مب شايف معاك حد
رندوش	:	خطفت طفل
غضبان	:	وينه ..

- رندوش : شرد .. لعوزني يا عم غضبان كل ما امسكه يشرد مني
- غضبان : لأنك غبي .. يومين غايب وما لقيت غير طفل واحد وبعد شرد منك
- رندوش : يا عم غضبان انا دورت بالشوارع ما لقيت أطفال لأن الشاطرين ما يطلعون من بيوتهم بالليل
- غضبان : اسمع يا رندوش مناليوم ما ابيك تخطف اطفال
- رندوش : عيل ايش اسوي يا عم غضبان
- غضبان : انت من باجر بتعلم دانه ومنصور الشغل
- رندوش : دانه ومنصور .. منهو دانه ومنصور
- غضبان : هذول اللي مربوطين جدامك .. ابيك تعلمهم الشغل غدل
- منصور : اي شغل
- العم سلامه : غضبان .. انت ايش بتشغل هالأطفال
- غضبان : بيشتغلون مثل باقي الأطفال اللي يعيشون بالجزيره
- (تقترب فتاه تدعى فطومه وتقدم صينية الأكل لغضبان)
- فطومه : الأكل جاهز يا عم غضبان (تضع الأكل امامه)
- غضبان : (يمسكها من شعرها) ليكون ما سويتي الأكل زين
- فطومه : (تتألم) لا يا عم غضبان سويته زين
- غضبان : يعني مب حاطه فيه ملح وايد مثل كل مره
- فطومه : لا ..
- غضبان : (يترك شعرها) بذوقه وأن طلع الأكل مب زين اروج يا فطومه (يتذوق الأكل بينما تبدو فطومه خائفه)
- لا امبين هالمره انج صرتي طباخه زينه
- دانه : عم سلامه حتى اهنيه في شغل انا ما صدقت افكك من زوجة ابوي
- العم سلامه : غضبان .. قولي ايش بتشغل الأطفال شنهو الشغل اللي يشتغلونه
- غضبان : قولي لهم يا فطومه ايش يشتغلون
- فطومه : يقطعون الأشجار
- منصور : نقطع الأشجار .. ليش ..

رندوش	:	علشان نبيع حطبها
فطومہ	:	ويعيدون السمج ونسوي الأكل حق القراصنة
غضبان	:	وبعد يا فطومہ .. قولي لهم ايش بيشتغلون بعد
فطومہ	:	ونبوق ونسرق الناس
منصور	:	يعني احنا بنشتغل مثلهم بنسرق
رندوش	:	اينعم
دانه	:	احنا مب حراميه
غضبان	:	احنا بخليكم تصيدون حراميه
منصور	:	اشلون يعني نصير حراميه
غضبان	:	بنعلمكم
دانه	:	احنا ما نبي نتعلم السرقة نبي نتعلم شي يفيدنا
غضبان	:	انتوا بتتعلمون السرقة وبتصيرون حراميه غصباً عنكم
منصور	:	ما في شي اسمه غصباً عنا احنا احرار ومحد يقدر يغصبنا على شي ما نبيه
دانه	:	هذي حريه .. والحرية حق من حقوقنا
رندوش	:	عم غضبان هذول السانهم طويل
غضبان	:	لا تخاف يا رندوش لين امنع عنهم الأكل واخليهم يموتون جوع بيصير السانهم قصير
العم سلامه	:	غضبان .. اللي تسويه بحق هالأطفال هذا خلق غير انساني الإنسان الله كرمه وله حقوق تضمن له ان يعيش بكرامة وحرية
غضبان	:	رندوش هذول بيعورون راسي بكلامهم الغريب جيب الأكل والحقني خلني اكل عدل (يخرج غضبان يحمل رندوش الطعام)
رندوش	:	انتوا مب قد غضبان ترى غضبان اذا عصب بيعذبكم (يخرج الطعام)
دانه	:	ايش بنسوي اللحين يا عم سلامه
العم سلامه	:	ما ادري يا دانه انتوا ايش اللي خلاكم تشردون من بيوتكم وتركبون السفينه
دانه	:	منصور قال انك بتسافر جزيرة الأحلام
العم سلامه	:	انا ما وعدتك ان اخذك معاي بالإجازة

- منصور : ايه يا عم سلامه بس انت عارف ابوي و امي ما بيوافقون
- العم سلامه : يعني اللحين عاجبك اللي صار
- دانه : (تنظر لفظومه) انتي اسمج فطوممه
- فظومه : ايه اشلون عرفتني اسمي
- دانه : سمعت غضبان يناديج فطوممه
- فظومه : انا فطوممه .. وغضبان خطفني وجابني جزيرة الأشباح
- منصور : يعني كل الأطفال اللي اهنيه مخطوفين
- فظومه : ايه .. كلنا مخطوفين
- دانه : وليش يخطفكم هالشرير
- فظومه : علشان يشغلنا عنده ولما نصير كبار يخلينا نسرق
- منصور : يعني في هالجزيرة ما في عندكم مدارس
- فظومه : لا ما عندنا وما يرضى يخلينا نتعلم مره كان عندي كتاب اقرأ فيه خذه غضبان واحرقه
- دانه : وليش ما ببيكم تتعلمون
- العم سلامه : لأن اذا تعلموا ما راح يقد عليهم غضبان
- فظومه : انتوا بعد بتصيرون مثلنا ولما تكبرون بخليكم غضبان تصيرون حراميه تسرقون الناس
- دانه : انا ما راح اصير حراميه
- منصور : وانا ما راح اصير قرصان
- العم سلامه : خلونا نفكر بحيلة علشان ننتصر على هالأشرار ونشرد منهم
- فظومه : ما راح تقدرن تشردون .. الجزيرة فيها اشباح وفيها طيور مفترسه ..
- العم سلامه : فطوممه انتوا شفتوا الأشباح
- فظومه : لا .. بس الطيور المفترسه شفتوها
- العم سلامه : مب يمكن غضبان يخوفكم بالأشباح وبهالطيور
- فظومه : لا .. الأشباح موجوده نشوف خيالها من بعيد
- (يدخل حسون وهو يضع الأقمشه البيضاء التي تغطي جسده فيظهر كما الشيخ فيرتعب الجميع ويصرخ)

- فوطمه : شفت الأشباح موجوده (تهرب)
(يهرب الأطفال من المسرح)
- دانه : عم سلامه الأشباح انا خايفه يا عم سلامه
- منصور : عم سلامه احنا خايفين يا عم سلامه
- العم سلامه : اعوذ بالله من الشيطان الرجيم (يتعثر حسون فتقع الأقمشه عنه وتسقط على منصور الذي يصاب بحالة رعب)
- منصور : لا .. لا هدوني .. هدوني انا ما سويت شي هدوني
- دانه : حسون
- العم سلامه : حسون .. انت ايش جابك اهنيه ..
(حسون يرى الأقمشه على منصور الذي يتحرك بشكل عنيف ليخلص من الأقمشه فيصاب بحالة رعب)
- حسون : (يرمي نفسه في حضن العم سلامه) الأشباح يا عم سلامه .. الأشباح
- عم سلامه : حسون .. حسون .. لا تخاف
- حسون : عم سلامه انت مب شايف الشبح
- عم سلامه : هذا مب شبح هذا منصور منصور صديقك (يستغرب حسون ويبدو غير مصدق)
- دانه : ايه يا حسون .. هذا منصور .. شيل عنه القماش علشان تتأكد انه منصور (يبدو حسون خائفاً ومتردد)
- عم سلامه : اشفيك يا حسون .. صدقني هذا منصور .. انت ليش خايف
- حسون : انت اكيد العم سلامه
- عم سلامه : حسون .. اشفيك ايه انا عم سلامه
- حسون : وانت ايكيد دانه
- دانه : حسون .. انا دانه
- حسون : يعني انتوا مب اشباح متكرين بصورة دانه والعم سلامه
- دانه : لا يا حسون .. احنا مب اشباح .. انا دانه وهذا العم سلامه .. وهذا منصور ارفع عن وجهه القماش وتأكد
- (يرفع حسون القماش فيصرخ منصور ويخاف حسون ويهرب بعيداً عنهم)

- عم سلامه : تأكدت يا حسون تعال يا حسون لا تخاف
- حسون : (خائفاً) يعنيانتوا مب اشباح
- منصور : حسون .. حسون انا منصور رفيجك ..
- حسون : لا انتوا اشباح متكرين
- دانه : صدقنا يا حسون احنا اخطفونا القراصنه
- حسون : لا .. لا لا انتوا الأشباح هذي جزيرة الأشباح وانتوا اشباح
- منصور : حسون .. حسون .. اسمعني احنا مب اشباح تعال فك هالحبال وخلصنا نشرد
- حسون : (متردد) لا لا ما اقدر افك هالحبال الا لما أتأكد إنكم مب اشباح
- دانه : (تصرخ فيه) يا حسون احنا مب اشباح
- حسون : لا اشباح انتوا بجزيرة الأشباح يعني انتوا اشباح
- منصور : وانت بعد اللحين بجزيرة الأشباح يعني انت بعد شبح
- حسون : لا انا مب شبح انتوا تقصون علي انتوا اشباح (يهرب)
- منصور : (يناديه) حسون .. حسون .. تعال يا حسون
- دانه : (تنادي) حسون .. حسون (للعم سلامه) حسون راح يا عم سلامه اللي كان بيخلصنا راح يعني ينتم بهالجزيرة يا عم سلامه
- عم سلامه : اصبري يا دانه .. خلونا نفكر اشلون نقدر نطلع من هالورطه
- دانه : انا خايفه الأشباح تهجم علينا واحنا مربوطين اهنيه
- عم سلامه : انا اللحين تأكدت ان هالجزيرة ما فيها اشباح
- منصور : اشلون ما فيها اشباح وهي اسمها جزيرة الأشباح
- عم سلامه : هذي خدعه يا منصور .. خدعه من غضبان .. علشان يخوفنا وما يخلينا نفكر بالهرب .. الإنسان ما يعيش بالوهم .. هالأشباح وهم
- (يدخل مجموعة قراصنه وهم يرتدون زي الأشباح يشعر الجميع باخلاف ويصرخون وكذلك يدخل الأطفال المخطوفين وتعم الفوضى والخوف على المسرح ثم يلحق الأشباح بالأطفال ويبقى شبح يحوم حول الثلاثة المقيدين على المسرح فيغمى على منصور ودانه من الخوف ثم يضرب الشبح العم سلامه على راسه فيسقط في حالة اغماء)

(يدخل غضبان وهو يضحك فيرفع الشبح الغطاء عن جسده ووجه ليظهر رندوش)	
غضبان :	(يضحك) خوش يا رندوش جذيه خوفناهم وصدقوا ان الجزيره فيها اشباح
رندوش :	الأطفال قدرنا نخوفهم بس هذا العم سلامه اشلون بنقدر نخوفه
غضبان :	لازم نخليه يخاف مثلهم
رندوش :	بس هذا ما يخاف يا عمي
غضبان :	عيل لازم نتخلص منه
رندوش :	اشلون نتخلص منه يا عم غضبان
غضبان :	نخليه مربوط ونقطه بالبحر
رندوش :	خوش فكره يا عمينشيله اللحين ونقطه بالبحر
غضبان :	لين نرجع
رندوش :	نرجع .. نرجع من وين
غضبان :	الللحين عندنا شغل .. بنروح نسرق السفن ولين نرجع نتخلص من العم سلامه ...
رندوش :	على امرك يا عم غضبان
غضبان :	ياالله روح نادي القراصنه علشان تروح (يخرج رندوش تدخل فطوممه خائفه
	وتصطدم بغضبان)
غضبان :	انتى ما تشوفين ..
فطوممه :	انا خايفه يا عم غضبان
غضبان :	من شنهو خايفه
فطوممه :	الأشباح .. الأشباح تلحقني
غضبان :	(بابتسامه) اسمعي يا فطوممه اذا تبين الأشباح ما تيجي لج لازم تسمعين كلام العم
	غضبان
فطوممه :	ان شاء الله يا عم غضبان انا بسمع كلامك
غضبان :	اللى يسمع كلام العم غضبان الأشباح ما تجيه فاهمه يا فطوممه
فطوممه :	فاهمه يا عم غضبان (يدخل رندوش)
رندوش :	عم غضبان .. احنا جاهزين القراصنه كلهم جاهزين
غضبان :	اسمع يا رندوش ابي تخلي بالك زين وتحمل يشردون منك

رندوش	:	عم غضبان انت ما بتاخذني معاك
غضبان	:	لا انت بتم اهنيه تحرس هذيلا لين نرجع
رندوش	:	حاضر يا عم غضبان
غضبان	:	رندوش اذا حد من الأطفال شرد يا ويالك
رندوش	:	محد يقدر يشرد من رندوش يا عم غضبان (يخرج غضبان)
رندوش	:	فطومه .. انتي ايش تسوين اهنيه
فطومه	:	انا .. انا .. انا خايفه
رندوش	:	خايفه من شنهو
فطومه	:	من الأشباح .. انت ما شفت الأشباح
رندوش	:	الأشباح .. ايه شفتهم اسمعي يا فطومه انا بروح انام وابيج تحرسين هذول واذا حد منهم تحرك تجين تتادينني بسرعه فاهمه
فطومه	:	فاهمه .. فاهمه يا رندوش
رندوش	:	ولا تسمعين كلامهم لا يقصون عليج اذا اشردوا يا فطومه ترى اخلي الأشباح تاكلج (يخرج رندوش)
	:	(فطومه تشعر بخوف بينما يبدأ منصور ودانه يفيفا من الإغماء)
دانه	:	عم سلامه .. عم سلامه
منصور	:	اصحى يا عم سلامه
العم سلامه	:	اه .. اه .. اه يا راشي . . اخ يا راشي الشبخ ضربني على راسي
دانه	:	عم سلامه .. عم سلامه خلينا نشرد من اهنيه
العم سلامه	:	اشلون نطلع من هالجزيره واحنا مربوطين
دانه	:	فطومه .. فطومه تعالي يا فطومه (تقترب فطومه بحرص منهم)
منصور	:	اشفيج يا فطومه خايفه
فطومه	:	انتوا ايش تبون مني
دانه	:	نبيج تفكينا
فطومه	:	لا ما اقدر
منصور	:	ليش يا فطومه

- فطوممه : اذا فكيتكم بتطلع لي الأشباح رندوش يقول جذبه
- العم سلامه : رندوش وغضبان يقصون عليكم ما في شي اسمه اشباح
- فطوممه : انا شفتهم (يدخل الأطفال خائفين وهم يصرخون)
- الأطفال : الأشباح .. الأشباح
- فطوممه : (بخوف) شفتوا .. هذي الأشباح اطلعت
- (يدخل حسون وهو مبتكر بزي الأشباح ويلبس على وجهه قناع)
- (يعم الخوف على الجميع ما عدا العم سلامه)
- حسون : (بصوت غليظ) انا الشبح واللي ما بيسمع كلامي انا باكله
- العم سلامه : (ضاحكاً) الأشباح ما تاكل
- حسون : عيل الأشباح ايش تسوي يا عم سلامه
- العم سلامه : انت اشلون عرفت اسمي
- حسون : (مرتبك) انا شبح واعرف كل الأسماء (يشير لدانه) هذي دانه (ويشير لمنصور) وهذا منصور
- العم سلامه : وهذي البنيه
- حسون : هه .. اي بنيه ..
- العم سلامه : اللي واقفه جدامي
- حسون : (بعصبية) انت اشفيك انا شبح وما اسمح لك تسألني
- العم سلامه : هذا الصوت مب غريب علي
- دانه : وانا بعد كأني سامعه هالصوت
- العم سلامه : انت منهو
- حسون : وبعدين معاك انت .. قلت لك انا شبح ..
- العم سلامه : واشلون احنا نصدق انك انت شبح
- حسون : يعني ايش تبيني اسوي علشان تصدق اني شبح
- العم سلامه : لو انت شبح صبح .. تفكنا (حسون يبدو متردد)
- منصور : يعني انت مب شبح
- حسون : (بإصرار) لا انا شبح

- منصور : عيل ليش ما تفكنا (يتقدم حسون ويفك قيودهم)
- (يقف العم سلامه ويهجم على حسون ويمسكه ويرفع عنه الغطاء فيكشف للجميع)
- منصور : حسون
- حسون : (بخوف) ارجوكم .. ارجوكم لا تسوون فيني شي
- دانه : حسون .. انت ليش خايف منا
- حسون : علشان انتوا اشباح
- دانه : احنا مب اشباح احنا القراصنه هاجموا سفينه العم سلامه واطفونا
- منصور : بس انت ايش اللي جابك اهنه انت مب خايتنا ورجعت البيت
- حسون : لا انا كنت انظر كم وجه رندوش وخطفني وشردت منه
- العم سلامه : صدقتوا يا اطفال ان ما في اشباح بهالجزيره
- فطوممه : غضبان يقول ان الجزيره فيها اشباح
- العم سلامه : لا تصدقونه .. غضبان اخترع كذبه الأشباح
- حسون : ايه صبح كلامك يا عم سلامه .. انا شفت ملابس كثيره للأشباح في الجبل
- العم سلامه : شفتوا يا اطفال هذي الملابس دليل ان غضبان وري هالكذبه
- دانه : وليش يسوي غضبان جذبه
- فطوممه : علشان يشغلنا عنده
- حسون : بس انتوا اطفال وما يصير يشغلكم
- فطوممه : غضبان وعصابته يخطفونا ويخلونا نخدمهم علشان لين نكبر نبوق
- العم سلامه : غضبان ما يبيكم تعيشون حياة كريمه
- فطوممه : وايش تسوي يا عم سلامه
- العم سلامه : انتوا لكم حقوق ولازم تعرفون شنه حقوقكم
- فطوممه : (حقوق وشنه حقوقنا)
- (استعراض غنائي يتم فيها استعراض لبعض بنود حقوق الإنسان الخاصة بالطفل مثل حق الحريه ، حق التعلم ، حق التعايش الاسري بأمان حق عدم التعرض للتعذيب .. الخ)
- (في نهاية الإستعراض يجتمع كل الأطفال حول العم سلامه)

- منصور : يعني انا من حقي يا عم سلامه اعيش في جو اسري ويكونعندي اسره يحبون بعض
- العم سلامه : ايه يا منصور من حقك وواجب الوالدين انهم يوفرون لك الجو الأسري المريح
- فطوممه : وانا اقدر ارجع مدرستي
- العم سلامه : ايه يا فطوممه تقدرين .. التعليم حق لكل طفل
- دانه : كلامك حلو يا عم سلامه بس منهو اللي بيحمي حقوقنا
- العم سلامه : الأسره والمجتمع وجمعية حقوق الإنسان
- حسنون : وين هذي جمعية حقوق الإنسان
- العم سلامه : بكل مكان في كل بلد موجوده واحنا الحمد لله عندنا جهة تساعد جمعية حقوق الإنسان هي اللجنة الوطنية لحقوق الإنسان وهذي اللجنة موجوده علشان تحمي حقوقنا (يدخل رندوش صارخاً)
- رندوش : انتوا من اللي فك قيودكم
- حسنون : أنا .. أنا يا رندوش ..
- رندوش : انت .. انت طلعت لي مره ثانية هالمره ما راح تقدر تشرد مني
- العم سلامه : (يتصدى لرندوش) رندوش وقف مكانك
- (يدفعه رندوش ويلحق بحسون فيتحد الجميع ويهجم على رندوش ويقيده)
- فطوممه : معقوله احنا قدرنا نربطه
- دانه : ايه يا فطوممه نقدر نسوي كل شي اذا اتحدنا وصرنا يد وحده
- رندوش : فكوني .. اقولكم فكوني والا يا ويلكم
- منصور : بعد وانت مرتبط تهددنا يعني ايش بتسوي
- رندوش : يا ويلكم اذا رجع العم غضبان
- دانه : وايش بيسوي غضبان
- رندوش : بيمسكم وبيربطكم كلكم وبيعذبكم
- دانه : التعذيب والضرب يعتبر جريمه في حق الإنسان
- رندوش : العم غضبان ما يعرف هالسوالف ويا ويلكم منه
- منصور : يعني خوفنا لا انت ولا غضبان يخوفونا

- رندوش : العم غضبان بيخلي الأشباح تطلع لكم
- حسون : اي اشباح
- رندوش : الأشباح اللي بالجزيره
- حسون : لعبتكم انكشفت يا رندوش الجزيره ما فيها اشباح
- رندوش : اشلون ما فيها اشباح .. الجزيره متروسه اشباح
- دانه : خلاص يا رندوش انكشفتوا وحسون شاف ملابس الأشباح بالجبل
- رندوش : الملابس اللي بالجبل
- فطوميه : ايه .. ملابس الأشباح اللي كنتوا تلبسونها علشان تخوفونا فيها
- رندوش : يعني انتوا عرفتوا كل شي
- منصور : ايه يا رندوش انكشفت الاعيكم
- رندوش : انا مالي ذنب غضبان هو الزعيم
- حسون : وانت ليش تخطف الأطفال
- رندوش : العم غضبان يخلينا نخطف الأطفال علشان يشغلهم حراميه
- دانه : انت ما تدري ان القانون يمنع استغلال الأطفال في العمل
- منصور : لا وتشغلونهم حراميه بعد
- رندوش : واذا كبروا يصيرون قراصنه يبوكون السفن
- العم سلامه : مب حرام اللي تسوونه يا رندوش
- رندوش : مب انا هذا العم غضبان
- العم سلامه : بس انتساعدده في هالشي
- رندوش : غصباً عني
- العم سلامه : لا يا رندوش محد يقدر يجبرك ان تسوي شي غصباً عنك ومن حقاك ترفض العمل هذا حقاك
- رندوش : محد يقدر يتكلم او يقول شي لغضبان يحبسه ويضربه
- العم سلامه : كل انسان حر ومحد يقدر يجبره ان يعيش بمكان ما بيبه ولا احد يقدر يحبسه وكل انسان له حريه الفكر والتعبير عن رايه
- رندوش : صدقوني انا ما اعرف هالأشياء منكم عرفت ان لي حقوق انا مثل هالأطفال

خطفني غضبان وهو اللي خلاني اسوي جديه	
العم سلامه :	اسمع يا رندوش اذا تبينا نسامحك لازم تساعدنا
رندوش :	اشلون اساعدكم
منصور :	تساعدنا علشان نرجع بيوتنا
رندوش :	اخاف من غضبان يذبطني
دانه :	واحا اللحين ساعة نفهمك حقوقك كأنسان وما في فايده
رندوش :	انتوا ما بتقدرون على غضبان
منصور :	اشلون ما نقدر عليه
رندوش :	غضبان مب بروحه مع قراصنه
منصور :	العقل اقوى من العضلات
رندوش :	وانا ايش اقدر اساعدكم فيه
العم سلامه :	تقولنا على طريق نقدر نشرد منه من هالجزيره
رندوش :	ما في غير البحر ..
دانه :	ما نقدر نطلع عن طريق الجبال
رندوش :	الجبال عاليه وبعيده ولين توصلونها يكون لحكم غضبان وري الجبال بعد بتلقون بحر
حسون :	لقيتها .. لقيتها ..
الجميع :	شنهو اللي لقيتها
حسون :	الفكره
دانه :	اي فكره
حسون :	فكره تخلينا نشرد من هالجزيره
دانه :	قول يا حسون
حسون :	نلبس كلنا ملابس الأشباح ونخوف غضبان والقراصنه
منصور :	فكره غبيه مثلك غضبان والقراصنه يدورون ان الأشباح كذبه وما راح يصدقون
رندوش :	لا محد يدري عن كذبة الأشباح غير غضبان وأنا .. القراصنه يعرفون ان فيه اشباح بالجزيره

- العم سلامه : فكره حسون حلوه
- فطومه : بس يا عم سلامه غضبان يعرف ان ما في اشباح
- العم سلامه : المهم ان القراصنه يصدقون ويبتعدون عنه واذا صار غضبان بروحه احنا بنقدر عليه
- حسون : شفتوا افكاري اشلون خطيره
- منصور : طلعت مب هين يا حسون
- دانه : انزين ايش تتطرون يا الله نروح الجبل علشان نلبس ملابس الأشباح ونخوف فيها القراصنه
- الجميع : يا الله ..
- رندوش : (يناديهم) وانا .. انا بتخلوني مربوط جزيه
- العم سلامه : لا .. انت بتيجي معانا
- حسون : وين يجي معانا يا عم سلامه
- العم سلامه : رندوش ساعدنا ولازم يجي معانا اذا خليناه اهنه مربوط راح يأذيه غضبان
- رندوش : إيه خذوني معاكم
- العم سلامه : فكوه .. يا الله فكوه (منصور وحسون يفكان قيد رندوش)
- دانه : يا الله نتحرك قبل لا يرجع غضبان (يخرجوا جميعاً)
- (يعود غضبان ومجموعة القراصنه وهم يحملون الصناديق التي سرقوها من السفن)
- غضبان : يا الله يا قرصنة حطوا الصناديق اللي بقناها في المخزن
- (يتجه القراصنه الى داخل وهم يحملون الصناديق) وين راح رندوش
- (ينتبه غضبان لعدم وجود العم سلامه والأطفال)
- غضبان : وين راحوا وين راحوا الأطفال .. وين العم سلامه وين عنهم رندوش .. (ينادي)
- رندوش .. رندوش ..
- (يدخل القراصنه وهم خائفين ثم نرى الأطفال متكرين بزي الأشباح)
- (تعم الفوضى المكان)
- غضبان : اشفيكم .. اشفيكم خافين

- العم سلامة : (وهو متذكر بزي الأشباح) خافين منا .. احنا الأشباح
- غضبان : اشباح .. اي اشباح .. لا تخافون منهم .. هذول مب اشباح هذول يقصون عليكم .. امسكوهم .. امسكوهم (يهرب القراصنه) تعالوا .. تعالوا .. لا تخافون منهم هذول مب اشباح .. ما في اشباح بهالجزيره تعالوا
- (يهجم الأطفال على غضبان الذي يحاول الفرار ولكنهم يقبضون عليه فيكشف الأطفال عن انفسهم ومعهم العم سلامة ورندوش)
- غضبان : رندوش .. انت بعد معاهم
- رندوش : ايه يا غضبان ايه انا معاهم لأنني عرفت منهم حقوقي
- غضبان : حقوق .. اي حقوق ..
- رندوش : حقوقي كأنسان انت جردتني من حقوقنا واستغلينا كعبيد عندك
- غضبان : رندوش .. رندوش ايش هالكلام اللي اسمعه منك من اللي علمك هالكلام
- منصور : احنا اللي علمناه
- فطوممه : وعلمونا احنا بعد
- غضبان : قصوا عليك يا رندوش
- دانه : محد قص عليه غيرك
- حسن : عم سلامة ايش نسوي بهالشرير غضبان
- العم سلامة : احنا ما راح نسوي فيه شي
- دانه : يعني نخليه يا عم سلامة
- العم سلامة : لا يا دانه .. العداله لازم تاخذ مجراها احنا بنسلمه للعداله وهم اللي يحكمون عليه ..
- فطوممه : عم سلامة .. احنا بترجعونا لبيوتنا
- العم سلامة : ايه يا فطوممه انتوا وكل الأطفال بترجعون بيوتكم وتبعيئون بأمن وامان وسلامه وتعيشون حياة كريمه بعد ما عرفتوا حقوقكم
- حسن : يا الله خلونا نرجع بيوتنا
- رندوش : عم سلامة والكنوز اللي بهالجزيره بنخليها
- عم سلامة : هذي مسروقات يا رندوش ولانم ترجع لأهلها

منصور : ومن اللي بيرجعها يا عم سلامه

عم سلامه : الشرطه .. يا الله يا اطفال خلونا نركب السفينه ونرجع ديرتنا ..

(الأطفال يجرون غضبان ويتجهون الى السفينه)

(استعراض غنائي يوضح فرحة الأطفال لحريتهم وتعلمهم حقوقهم وانتصار الخير

على الشر)

نهاية المسرحية

تأليف : طالب الدوس